

太原府志卷五十

遺事

作史者編年正史之外有雜史蓋自為一家或數代或一時一代之跡體制不純事多互異然博採旁搜亦足以廣學人之聞見志乘一書凡其人其事之係於其地者既已攷諸史冊分門別類以紀之矣而或一典制之相傳一經營之偶及有不得入於正條者又以遺事概之以脩一郡之掌故其亦雜史之流亞歟志遺事

周成王封弟叔虞於唐唐在河汾之東曰唐叔虞子燮徙居晉水稱晉侯晉侯孫成侯徙都曲沃傳五世為穆侯徙都絳穆侯孫昭侯元年封弟成師於曲沃凡五傳為晉侯緡緡二十八年成師孫稱伐晉滅之周釐王命為

太原府志

卷五十 遺事

一

晉君更號曰晉武公始都晉國子獻公八年城聚都之命曰絳始都絳七傳至景公十五年遷新田景公後九世為幽公幽公之時獨有絳曲沃餘胥入三晉至幽公曾孫靜公俱洒二年魏文侯韓哀侯趙敬侯三分其地靜公遷為家人居端氏

成王分唐叔以大路密須之鼓註密須國名闕鞏註甲名姑洗

註鐘名

國語唐叔行至徒林遇兕焉引弓以射一發而殪之以其皮為大甲

文侯之命王曰父羲和其歸視爾師寧爾邦用賚爾秬鬯一卣一彤弓一彤矢百盧弓一盧矢百馬四匹

左傳僖十七年晉作爰田作州兵

僖二十七年晉文公作執秩以正其官

僖二十八年五月己酉王享醴命晉侯宥王命尹氏及王子虎內史叔與父策命晉侯爲侯伯賜之大輅之服戎輅之服彤弓一彤矢百旅弓矢千秬鬯一卣虎賁三百人

僖三十三年晉發命遽興姜戎子墨衰經遂墨以葬文公晉於是始墨

趙氏之先與秦共祖至蜚廉子季勝生孟增是爲宅臯狼臯狼孫造父御穆王有功賜以趙城由此爲趙氏造父以下六世至奄父生叔帶去周如晉事晉文侯始居晉國五世而生趙夙晉獻公十六年滅耿霍魏賜夙耿夙生共孟共孟子趙衰事文公爲原大夫居原歷盾朔

武景叔四世生鞅是爲簡子晉頃公十二年分祁氏羊舌氏邑爲十縣各令其族爲之大夫鞅卒次子無恤立是爲襄子襄子元年平代地封鞅長子伯魯子周爲代成君四年與知伯韓魏盡分范中行氏地復與韓魏滅知伯分其地於是趙北有代南并知氏彊於韓魏襄子卒代成君子浣立是爲獻侯治中牟始列爲諸侯禮記郊特牲大夫之奏肆夏也由趙文子始也日知錄昭公元年晉敗無終及羣狄於大鹵而太原爲晉有矣

昭公二十九年趙鞅荀寅賦晉國一鼓鐵以鑄刑鼎著范宣子所爲刑書焉仲尼曰晉其亡乎失其度矣貴賤不愆所謂度也文公是以作執秩之官爲被廬之法以

爲盟主今棄是度也而爲刑鼎鼎在民矣何以尊貴且夫宣子之刑夷之蒐也晉國之亂制也若之何以法榆次神頭村俗傳智伯爲趙襄子所殺取頭爲溺器國人哀之因刻木爲首以葬故名其地爲神頭村

漢趙歇趙後也秦二世二年端月張耳陳餘立歇爲趙王三年項羽入關立諸侯乃分趙立耳爲常山王而徙趙王歇王代漢之元年田榮遣兵從餘襲常山王耳耳敗走歸漢餘收趙地迎趙王於代復爲趙王趙王德餘立以爲代王餘爲趙王弱國初定留傅趙王而使夏說以相國守代漢二年漢遣張耳韓信進擊趙代擒夏說闕與擊破趙井陘斬陳餘泚水上追殺趙王歇

韓王信故韓孽孫也高祖定三秦已復畧定韓地高祖

太原府志

卷五十一 遺事

三

乃立信爲韓王命與周苛等守滎陽楚拔之遂降乘間復歸楚滅後以太原爲韓國徙信脩邊都晉陽信請徙馬邑從之匈奴大人圍馬邑數使人求和解高祖疑有二心賜書讓之信懼誅因降北匈奴與共攻太原高祖自往擊破其軍於銅鞮信亡入北後爲將軍柴武斬於

參合

後漢袁紹字本初汝南汝陽人司徒湯孫何進謀誅宦官轉紹司隸校尉董卓至奔冀州初平二年以渤海太守起兵討卓領冀州牧興平二年六月破斬黑山賊於壽遂循山北行進擊諸賊皆斬之以長子譚爲青州刺史中子熙爲幽州刺史外甥高幹爲并州刺史建安元年使將作大匠孔融持節拜紹大將軍錫弓矢節鉞虎賁

百人兼督青冀幽并四州

晉杜預春秋後序晉太康中汲縣人發其界內舊冢得古書皆簡編科斗文字記晉國起自殤叔次文侯昭侯以至曲沃莊伯莊伯之十一年十一月魯隱公之元年正月也皆用夏時建寅之月爲歲首編年 鶴林玉露傳據晉史經則周歷

建武元年以溫嶠爲散騎侍郎嶠以母亡值寇不臨殯葬欲營改葬固讓不拜元帝詔令三司八座門下三省外內羣臣詳共通議如嶠比吾將親裁其中於是太宰西陽王羨等議嶠遭難昔在河朔日尋干戈志刷讐惡萬里投身歸赴朝廷將欲因時竭力憑賴王威以展其情此乃嶠之志也無緣道路未通師旅未進而更中辭

太原府志

卷五十

遺事

四

王事留志家巷也以爲誠宜如明詔於是有司奏曰案如衆議去建武元年九月下辛未令書依禮文父喪未葬惟喪主不除以他故未葬人子之情不可居殯而除故期於畢葬無遠近之斷也若亡遇賊難喪靈無處求索理絕固應三年而除不得故從未葬之例也若骨肉殲於寇害死亡湧於中原而繼以遺賊未滅亡者無收殯之實存者又闕於奔赴之禮而人子之情哀痛無斷輒依未葬之義久而不除若遂其情則人居無限之喪非有禮無時不得之義也諸如此皆如東闕故事限行三年之禮畢而除也惟二親生離吉凶未分服喪則凶事未據從吉則疑於不存心憂居素出自人情有如此者非官制之所裁今嶠以未得改卜奔赴累設疾辭案

辛未之制已有成斷皆不得復遂其私情不服王命以虧法憲叅議可如前詔嶠受拜重告以中丞司徒諸如嶠比者依東闕故事辛未令書之制嶠不得已乃拜是時中原喪亂室家離析朝廷議二親陷沒寇難應制服不太常賀循曰二親生離吉凶未分服喪則凶事未據從吉則疑於不存心憂居素允當人情元帝令以循議爲然大興二年司徒荀組云二親陷沒難萬無一冀者宜使依王法隨例行喪庾蔚之云二親爲戎狄所破存亡未可知者宜盡尋求之理尋求之理絕三年之外便宜婚宦後嗣不可絕王政不可廢故也猶宜以哀素自居不豫吉慶之事待中壽而服之也若境內賊亂清平肆靑之後尋覓無蹤跡者便宜制服

温嶠前妻李氏在嶠微時便卒又取王氏何氏並在嶠前死及嶠薨朝廷以問陳舒三人並得爲夫人不舒云禮記其妻爲夫人而卒而後其夫不爲大夫而祔於其妻則不易牲妻卒而後夫爲大夫而祔於其妻則以大夫牲然則夫榮於朝妻貴於室雖先夫沒榮辱常隨於夫也禮記曰妻祔於祖姑祖姑有三人則祔其親者如禮則三人皆爲夫人也自秦漢以來廢一娶九女之制近世無復繼室之禮先妻卒則更娶苟生加禮則亡不應貶庾蔚之云賤時之妻不得並爲夫人若有追贈之命則不論耳嶠傳贈王何二人夫人印綬不及李氏

元和

七年太學博士韋肅議鄭餘慶私廟二夫人祔配曰謹按晉驃騎大將軍温嶠相繼有三妻疑並爲夫人以問太學博士陳舒舒以妻雖先後榮辱並隨夫也禮祔於祖姑祖姑有三人則各祔舊之所生如其禮意三

人皆夫人也秦漢以來諸侯不復一娶九女既生娶以正禮沒不可貶自後諸儒咸用舒議

劉曜攻晉陽劉琨使張喬拒之戰於武灌

即武觀在河渦水側

喬

敗死晉陽太守高錕等皆降琨屯榆次與左右數十騎攜妻子奔趙郡遂如常山

北魏爾朱榮字天保北秀容人新興子也襲爵除直寢游擊將軍以討賊功進封博陵郡公靈太后以李神軌爲大都督將於大行杜防榮發晉陽遂次河內四月莊帝自高渚渡至榮軍卽位詔以榮爲使持節都督中外諸軍事大將軍開府尙書令領軍將軍領左右太原王渡河惑武衛將軍費穆言遂有河陰之役時朝士百餘人後至唱云能爲禪文者出當原其命隴西李神儁頓邱李諧太原溫子昇並當世詞人皆在圍中俯伏不應有

太原府志

卷五十一 遺事

六

御史趙元則者出作之榮遂鑄金爲己像數四不成幽州人劉靈助善卜占亦言天時人事未可榮精神恍惚不自支持至四更乃迎莊帝奉駕向洛陽宮女立爲后榮意甚悅五月還晉陽乃令元天穆向京樹置腹心在列職七月詔加柱國大將軍位在丞相上時葛榮向京師衆號百萬相州刺史李神儁閉門自守榮率精騎七千大破之擒葛榮餘衆悉降乃檻送葛榮赴闕詔加大丞相都督河北畿外諸事實封十萬戶爲太原國邑又加位太師永安二年加天柱大將軍增佐史封邑通前二十萬戶加前後部羽葆鼓吹榮屯晉陽遙制朝廷親戚腹心皆補要職朝廷動靜莫不以申三年八月榮將四五千騎發并州九月初至京榮小女嫁於帝兄子陳

留王伽邪嘗指之曰我終當得此女壻力十五日天穆到京十八日上召中書舍人溫子昇問殺董卓事昇具道本末上曰王允若卽赦涼州人必不應至此二十五日曰榮天穆同入誅之時年三十八天穆與榮子菩提亦就戮節閔帝初贈假黃鉞相國錄尚書都督中外諸軍事晉王加九錫給九旒鑾輅虎賁班劍三百人輜輶車準晉太宰安平獻王故事諡曰武又詔百官議榮配饗司直劉季明曰晉王若配永安則不能終臣節以此論之無所配乃配享孝文廟庭菩提位太常卿開府儀同三司侍中特進死時年十四贈司徒諡惠菩提弟又羅武衛將軍梁郡王尋卒贈司空又羅弟文殊封平昌郡王孝靖初轉襲榮爵太原王卒於晉陽時年九歲文

殊弟文暢初封昌樂郡公以榮破葛榮功進王拜開府儀同三司肆州刺史齊神武將臨觀打蒺戲謀竊發坐死時年十八弟文畧襲又羅爵梁郡王聰明雋爽多所通習齊文襄常令章永興馬上彈琵琶奏十餘曲試使文畧寫之遂得八文襄戲之曰聰明人多不老壽梁郡其慎之文畧對曰命之修短皆在明公文襄愴然曰此不足慮初神武遺令恕十死平秦王有七百里馬文畧敵以好婢賭取之殺馬及婢以二銀器盛之遺平秦王後伏法文畧嘗大遺魏收金請爲父作佳傳收論榮比韋彭伊霍皆由是也

爾朱兆字萬人榮從子少善騎射趨捷過人手格猛獸榮特加賞愛榮曾送臺使見二鹿授兆二箭令取供今

食篝火以待之俄而兆獲其一榮欲誇使人杖兆五十榮入洛兆從征捕有功累除車騎大將軍儀同三司汾州刺史榮死兆自汾州據晉陽輕兵倍道掩襲洛京策馬涉河是日暴風鼓怒黃塵漲天遂有雲龍之役初榮既死莊帝詔河西人紇豆陵步蕃等令襲秀容兆入洛後步蕃兵勢甚盛南逼晉陽兆不暇留洛迴師禦之頻爲步蕃所敗謀出山東令人徵齊神武於晉州神武赴之步蕃至樂平郡神武與兆還破之斬之節閔帝授兆使持節侍中都督中外諸軍事柱國大將軍兼錄尚書事大行臺又以兆爲天柱大將軍兆固辭不拜尋加都督十州諸軍事世襲并州刺史神武克殷州兆與仲遠度律約拒之仲遠度律次陽平屯廣阿衆號十萬神武

廣縱反間乃各致猜疑仲遠等於是奔退神武進擊兆軍大敗世隆請節閔納兆女爲后兆乃大喜與天光度律大會韓陵山戰敗復奔晉陽其年神武自鄴進討之兆遂大掠并州走秀容神武又追擊度赤洪嶺破之兆竄窮山殺所乘馬自縊於樹神武收葬之榮嘗云兆不過將三千騎多則亂耳兆弟智彪封安定王與兆俱走神武擒之後死於晉陽

普泰初特以尒朱世隆爲儀同三司位次上公

東魏武定三年高歡言并州軍器所聚動須女功請置宮以處配没之口於是置晉陽宮

唐武士護字信世殖貨喜交結高祖嘗領屯汾晉休其家因被顧接後留守太原引爲行軍司鎧參軍募兵旣集

以劉宏基長孫順德統之王威高君雅欲劾繫之士護  
曰此皆唐公客若爾必有大嫌故威等疑不發會司兵  
叅軍田德平欲勸威劾募人狀士護脅謂曰討捕兵悉  
隸唐公威君雅無與徒寄坐耳何能爲德平亦止兵起  
士護不與謀以大將軍府鎧曹叅軍從平長安爲光祿  
大夫義原郡公累遷工部尚書進封應國公歷利荆二  
州都督卒贈禮部尚書諡曰定高宗永徽中以仲女爲  
后宗贈并州都督司徒周國公咸亨中加贈太尉兼太  
子太師太原郡王配享高祖廟廷列功臣上後僞上尊  
號建崇先府置官屬先天中詔削僞號仍爲太原王廟  
遂廢

武士稜字彥威士護兄少柔願力田官司農少卿宣城

太原府志

卷五十一 遺事

九

縣公常主苑囿農家事卒贈潭州都督陪葬獻陵

武士逸字述士護兄有戰功爲齊王府戶曹叅軍六安  
縣公從齊王守太原爲劉武周所執常遣間人陳破賊  
計賊平擢授益州行臺左丞數言當世得失上嘉納之  
終韶州刺史

武承嗣元爽子以勳擢尚輦奉御襲周國公遷秘書監  
禮部尚書俄以太常卿同中書門下三品未幾辭位垂  
拱初以春官尚書同鳳閣鸞臺平章事改納言又爲文  
昌左相議追王先世立宗廟追王元慶曰梁王諡憲元  
爽魏王諡德后從父士讓楚王諡僖士逸蜀王諡節又  
贈兄子承業陳王而承嗣爲魏王元慶子三思爲梁王  
士讓孫攸寧爲建昌王攸歸九江王攸望會稽王士逸

孫懿宗河內王嗣宗臨川王子仁範河間王仁範子載  
德潁川王士稜孫攸暨千乘王維良子攸宜建安王攸  
績安平王從子攸止恒安王重規高平王承嗣子延基  
南陽王延秀淮陽王三思子崇訓高陽王崇烈新安王  
承業子延暉嗣陳王延祚咸安王承嗣實封千戶監修  
國史以特進罷未幾復同鳳閣鸞臺三品承嗣爲左相  
攸寧爲納言皆罷又與三思同三品不及月俱免復拜  
特進久之遷太子太保鞅鞅憤死贈太尉并州牧諡曰  
宣延基襲爵后嫌斥其名更曰繼魏王長安初自殺以  
延義代王中宗復位侍中敬暉等言諸武不當王與郡  
臣白奏事不兩大武家諸王宜免纔降封一級皆爲國  
公終湖州刺史諡武烈攸歸歷司屬少卿至齊州刺史

事母孝姊亡晷不嘗五辛語輒流涕攸止絳州刺史三  
人死周時不及削封攸宜歷同州刺史萬歲通天初爲  
清邊道行軍大總管還拜左羽林大將軍景龍時遷右  
羽林率總禁兵前後十年嗣宗終司衛卿重規爲汴鄭  
二州刺史貶盧州刺史復爲天兵中道大總管還爲左  
金吾衛大將軍終衛尉卿延秀就婚突厥久不得歸神  
龍初還封柏國公左衛中郎將尚安樂公主以太常卿  
兼右衛將軍封恒國公後誅於肅章門攸望以太府卿  
貶死春州諸武屬坐延秀誅徙者畧盡獨載德子平一  
以文章顯與攸緒常避盛滿故免攸寧天授中累擢納  
言踰年以左羽林衛大將軍罷俄還納言久乃罷爲冬  
官尚書聖歷初同鳳閣鸞臺平章事自承嗣三思罷政

事間一年攸寧三思復當國以冬官尚書罷神龍初終岐州刺史贈尚書右僕射三思當周時累進夏官春官尚書監修國史爵王爲榆關道安撫大使屯邊還同鳳閣鸞臺三品踰月去位又檢校內史罷爲太子少保遷賓客仍監國史子崇訓尚主三思方輔政令具迎禮中宗復位擢崇訓駙馬都尉太常卿兼左衛將軍三思進位司空同中書門下三品加實封五百固辭進開府儀同三司會降封裁減實戶俄還所減而封崇訓鎬國公明年三思因主請復崇思廟昊順二陵皆置令丞後與崇訓爲節愍所誅舉哀廢朝五日贈太尉復封梁王諡曰宣追封崇訓魯王諡曰忠睿宗初夷其墓

武懿宗士逸孫以司農卿爵爲郡王歷懷洛二州刺史

神功元年爲神兵道大總管討孫萬榮後復撫循河北始萬榮入寇也別帥何阿小殘忍以懿宗似之故號稱兩河神龍初遷太子詹事終懷州刺史

武攸暨士稜孫自右衛中郎將尚太平公主拜駙馬都尉累遷右衛大將軍天授中自千乘郡王進封定王實封戶六百遷麟台監司祀卿長安中降王壽春加特進中宗時拜司徒復王定加戶千固辭進開府儀同三司降楚國公攸暨於時無忤專自奉養景龍中卒贈太尉并州大都督還定王諡曰忠簡後坐夷墓

則天順聖皇后武氏士護女高宗時由昭儀宸妃册爲皇后命羣臣及四夷酋長朝肅義門內外命婦入謁朝后自此始始士護娶相里氏生子元慶元爽又娶楊氏

生三女伯嫁賀蘭越石早寡封韓國夫人仲卽后季嫁郭孝順前死楊以后故寵日盛徙封榮國始兄子惟良懷運與元慶等遇楊及后禮薄后銜不置及是元慶爲宗正少卿元爽少府少監惟良司衛少卿懷運淄州刺史它日韓國置酒酣謂惟良曰若等記疇日事乎今謂何對曰幸以功臣子備位朝廷晚緣戚屬進憂而不榮也韓國怒諷后僞爲退讓請惟良等外遷繇是惟良等皆出爲州刺史俄而元爽坐事死振州元慶至龍州憂死韓國卒女國妹封魏國夫人欲以脩嬪職會封泰山惟良懷運以岳牧來集從還而魏國暴卒歸罪惟良等盡殺之以韓國子敏之奉士護祀俄貶死咸亨元年贈士護太尉兼太子太師太原郡王楊氏魯國忠烈夫人

爲妃上元元年進號天后建言十二事皆下詔畧施行之儀鳳三年卽并州建太原郡王廟中宗初稱皇太后叅決軍國大務嗣聖元年臨朝以睿宗嗣后坐武成殿上號册越三日臨軒命禮部尙書攝太尉武承嗣太常卿攝司空王德眞册睿宗自是常御紫宸殿施慘紫帳臨朝追贈五世祖爲魯國公妣爲夫人高祖以下皆爲郡王妣皆爲王妃遣册使告五世廟室承嗣請立七廟中書令裴炎沮止及徐敬業敗詔爲明堂又度明堂後爲天堂作崇先廟於西京享武氏后自號聖母神皇作神皇璽拜洛受圖大陳珍竒貢物鹵簿壇下禮成立永昌元年享萬象神宮改服袞冕搢大圭執鎮圭合祭天北五方地百神從以高祖太宗高宗配引魏王氏護從

配以文水墓爲章德陵載初中又享萬象神宮以太穆  
文德二后配皇地祇以母楊氏從配作罍西峯 ㊟  
風嵐鳳垂由十二文后自名罍令作大雲經因改號周  
自稱聖神旌幟尙赤以睿宗爲皇嗣立武氏七廟於神  
都僞上尊號至日祀萬象神宮以始祖及考妣配以百  
神從祀盡王諸武詔并州文水縣爲武興比漢豐沛百  
姓世給復以章德陵爲昊陵明年享神宮自制大樂舞  
工用九百人又自加號金輪聖神置七寶於廷曰金輪  
寶曰白象寶曰女寶曰馬寶曰珠寶曰主兵臣寶曰主  
藏臣寶率大朝會則陳之延載二年作天樞功德大哀  
銅鐵合冶之署曰大周萬國頌德天樞置端門外其制  
若柱度高一百五尺八面面別五尺冶鐵象山爲之趾

負以銅龍石鑱恠獸環之柱顛爲雲蓋出大珠高丈圍  
二之作四蛟度丈二尺以承珠其趾山周百七十尺度  
二丈無慮用銅鐵二百萬斤乃悉鏤羣臣蕃酋名氏其  
上遂祀南郊以祖考與唐高祖並配加號天冊金輪聖  
神封嵩山禪少室冊山之神爲帝配爲后封壇南大櫨  
樹爲金雞樹自制升中述志刻石示後改明堂爲通天  
宮鑄九州鼎又斂黃金爲大儀鐘不克久之以崇先廟  
爲尊崇廟禮視太廟旋復崇尊廟爲太廟改昊陵爲攀  
龍臺神龍元年居迎仙院中宗復位后徙上陽宮遷東  
都武氏廟於崇尊廟更號崇恩諸武咸降爵是歲薨諡  
則天大聖后祔乾陵詔崇恩廟詞如太廟齋卽用五品  
子及韋武黨誅詔廢崇恩廟及陵尋黜土護僞號復爲

太原郡王楊氏仍爲妃罷吳順等陵

長安元年洛雍并荆揚益六州置左右司馬各一員

張說檢校并州長史兼天兵軍大使修國史敕齋藁卽

軍中論譟

開元以後增置太原府爲北京官屬制置悉同兩京

開元十一年更天兵軍節度爲太原府以北諸軍州節

度河東道度支營田使兼北都留守領太原及遼石嵐

汾代忻朔蔚雲九州治太原此河東節度使之始

王涯定循資格

大中五年以白敏中充招討党項行營都統制置等使

制置使之名始此

懿宗拜白敏中司徒門下侍郎平章事未幾加中書令

太原府志

卷五十一 遺事

十四

宋裴庭裕東觀奏記白敏中守司徒兼門下侍郎充邠

寧行營都統討山南平夏党項發日以禁軍三百人從

敏中上論請依裴度討淮西故事開幕擇廷臣不阻大

吏上允之

太中十二年七月十四日三更三點退朝惟宰臣夏侯

孜獨到衙以中元休假通事舍人無在館者麻案旣出

孜獨麻畢乃召當直中書舍人馮圖宣之捧麻皆兩省

胥吏自此始令通事舍人休澣亦在館俟命

宋太平興國四年平劉繼元降爲繁州軍事嘉祐四年復

爲太原府河東節度使領河東路經畧安撫使大觀元

年陞大都督府劉安世曰河東晉地也昔高辛氏遷閼

伯於商邱主參今應天是也遷實沈於大夏主商今太

原是也且參商不相能久矣物不兩大故國初但曰并州不加府號有深意也又本朝下河東在戊寅三年重午日實火土旺日此參木神所忌故克之時宋受命已十九年矣而晉始服且太祖太宗嘗親征而得太原正以其地控扼朔方下瞰長安纔數百里棄太原則長安汴城不可都矣靖康元年五月李綱爲宣撫使督諸軍救太原九月九日太原陷晉之地屬宋朝纔一百四十九年中書門下班分東西向謂之蛾眉班自玉溥始王溥罷相歸班

皇祐五年制以樞密使高若訥爲尙書令丞觀文殿學士兼翰林侍讀學士同羣牧制置使故事罷樞密使當學士降麻及若訥罷但令舍人草詞遂以爲例

太原府志

卷五十一 遺事

十五

金初太原爲蒙古所有河北州縣不能自立翰林承旨徒單鎬等言欲戰則兵力不足欲和則彼不肯惟有守耳河朔州郡旣殘毀不可一概守之宜取順就遷徙者屯於河南陝西不願者許自推其長保聚險阻宣徽使移刺光祖等謂當募土人威望服衆者假以方面重權能復一道卽授以本道總管能捍州郡卽授以長佐必能各保一方宰臣欲置公府金主意未決中丞完顏宿嘉曰宋人以虛名致李全遂有山東苟能統衆守土雖三公何惜乃封經畧使王福等九人爲郡公滄州河間正定雄霸涿易太原平陽澤潞益都開府凡九元亨羅帖木兒答十八都羅之子也討賊屢立戰功十九年詔領大都督兵農司專督屯糧二十年兵駐大同詔

除中書平章政事尋命守石嶺關以北時察罕帖木兒守石嶺關以南九月孛羅帖木兒欲得冀寧遣兵自石嶺關直趨圍其城三日退屯交城十月詔孛羅帖木兒守冀寧守者不訥察罕帖木兒以兵來爭戰敗之二十一年罷兵還鎮初朝廷既黜御史大夫老的沙安置東勝州帝別遣宦官密論孛羅帖木兒令留軍中而皇太子累遣官索之匿不發二十四年陰使人殺其叔父左丞亦只兒不花朝廷知之皇太子又以孛羅帖木兒匿老的沙事遂與丞相搠思監議下詔罷兵權孛羅帖木兒殺使者拒命遣部將會禿堅帖木兒提兵犯關四月入居庸至清河列營將犯闕帝乃屏搠思監於嶺北庚戌自健德門入詔以孛羅帖木兒爲太保中書平章兼

知樞密院事守禦大同以禿堅帖木兒爲中書平章政事辛亥孛羅帖木兒還大同皇太子恚怒不已乃徵擴廓帖木兒兵保陣京師五月詔擴廓帖木兒總兵調諸道軍分討大同擴廓帖木兒乃調麾下鎖住守護京師以部下青軍楊同僉守居庸自將至太原調督諸軍七月孛羅帖木兒復率兵犯闕京師震駭丙戌皇太子親統兵迎於清河不克馳入城丁亥夜鎖住脅東宮官僚從太子奔太原孛羅兵至駐健德門欲追襲皇太子老的沙力止之入見帝宣文閣泣拜訴寃帝亦爲之泣乃賜宴庚寅就命孛羅帖木兒太保中書左丞相老的沙中書平章政事禿堅帖木兒御史大夫部屬將士布列臺省總攬國柄尋詔加開府儀同三司上柱國錄軍國

重事太保中書左丞相節制天下數遣使請皇太子還朝使至太原拘留不報二十五年皇太子在外日夜謀除內難承制調遣西北諸道軍及擴廓帖木兒軍進討軍聲大振孛羅帖木兒患之遣驍將姚伯顏出禦兵至通州被襲見殺孛羅帖木兒乃自將出通州三日大雨而還鬱鬱不樂日與老的沙飲宴荒淫無度威順王子和尚受帝密旨陰圖刺之七月乙酉孛羅帖木兒起入奏事勇士伯達兒自衆中奮出斫之中腦死老的沙傷額趨出擁孛羅帖木兒母及妻子北遁有旨令民間盡殺其部黨明日遣使函孛羅帖木兒首級往太原詔皇太子還朝諸道兵聞詔罷歸十二月獲秃堅帖木兒老的沙皆伏誅

擴廓帖木兒本察罕帖木兒之甥自幼養以爲子遂襲總兵柄初駐兵汴洛朝廷倚以爲安會孛羅帖木兒數以兵爭晉冀乃駐大同二十四年因孛羅帖木兒之亂奉皇太子奔太原亡何孛羅帖木兒伏誅遂扈從皇太子入朝詔拜左丞相繼出封河南王俾總天下兵柄令出師江淮擴廓帖木兒自京師還河南兵不進發朝廷因疑其有異志初皇太子之奔太原也欲用唐靈武故事擴廓帖木兒不從及還京皇后傳旨令擴廓帖木兒以重兵擁太子入城欲脅帝禪之擴廓帖木兒知其意比至京城三十里卽散遣其軍由是皇太子心銜之及是聞詔趣其出師第遣其弟脫因帖木兒及其部將等以兵往山東而江淮之命終置不問帝又下詔不聽乃

戕殺詔使二十七年八月帝命皇太子親出總天下兵馬分命擴廓帖木兒以其兵自潼關以東肅清江淮擴廓帖木兒終扞拒不受二十八年朝廷命左丞孫景益分省太原擴廓帖木兒卽遣兵據太原而盡殺朝廷所置官帝乃下詔削奪爵邑令諸軍共誅之二月擴廓帖木兒退守於平陽時明兵已及河南諸道軍皆解歸旣而擴廓帖木兒上疏自陳帝下詔滌其前非於是明兵已定山東及河洛中原俱不守帝詔復擴廓帖木兒原爵統兵從河北南討擴廓帖木兒乃自平陽退守太原已而明兵至太原卽棄城遁領餘衆西奔於甘肅明初榆次翟丙由吏員除山東諸城典史以薦擢戶部主事歷官兵部右侍郎

嘉靖時太原吏部尙書王瓊贈太師明冢宰贈太師惟蹇忠定義王端毅及公三人而已

嘉靖五年秋七月妖人李福達坐死福達崞縣人初以妖賊王良謀反事發戍山丹衛逃還改名午竄居陝西洛川縣與季父越同倡白杜妖術爲彌勒佛教誘愚民嘯聚數千人大掠鄜州洛川諸處殺掠亡算已而官兵追勦捕得越及其黨誅之福達逃至徐溝縣變姓名爲張寅賄縣中大姓爲同宗編立宗譜己又挾重貲入京竄入匠籍輸粟爲山西太原衛指揮其子俱補匠籍以燒煉術往來武定侯郭勛家後仍往同戈鎮其仇薛良首發之福達懼逸入京官捕其二子按繫之福達窘乃自詣獄置對先後鞠訊官皆按狀獨巡撫畢詔謂福達

果張寅爲仇家誣所致反其獄以居民戚廣等爲証坐良罪獄未竟詔乞侍養去會御史馬錄按山西復窮治之傳爰書如前訊勛爲遺書囑免錄不從擬福達謀反妻子緣坐飛章劾勛黨逆并上其手書帝下之都察院席書書亦助勛爲福達地大理寺評事杜鸞上言劾勛及書乞將二人先正國法徐命多官集議福達之罪不報都察院覆奏宜行山西巡按官移獄三司會鞠先是馬錄咨於徐溝給事中常泰又咨於讞獄郎中鄜人劉士皆言寅爲福達不疑復檄取鄜洛父老識福達者辨之俱以爲眞乃檄布政司按察司僉事都指揮使等雜鞠之無異辭遂附爰書上錄乃會巡撫江潮上言論福達極刑武定侯勛黨逆亦宜抵法左都御史聶賢亦言

福達罪狀帝從之錮獄未決因詰責郭勛令自輸罪勛懼乞恩因爲福達代辨帝置不問於是給事中劉琦常泰張達等先後上疏劾勛帝不從勛因自訴且詭以議禮觸衆怒爲言帝信之尋命錦衣千戶移取福達獄詞下鎮撫司會鞠詞如前勛乃與張璉桂萼等合謀爲蜚語謂廷臣以議禮故借事陷勛帝命逮福達至京鞠之刑部尙書顏頤壽等會訊於午門外薛良等共指福達福達語塞至訊戚廣等則云我曩未就吏訊安得此言獄上上心益疑欲親鞠大學士楊一清奏止頤壽等懼乃雜引前後讞詞指爲疑獄上切責頤壽等乃逮馬錄赴京下鎮撫司獄待鞠取原勘各官詣京卽訊頤壽等出錄與福達對鞠情無反異獄復上帝怒頤壽等朋比

罔上乃逮繫頤壽及一時審鞠諸臣卽命張璉桂萼方獻夫攝三司事雜治之璉等逢合帝意鞠錄等於闕廷榜掠備至錄乃誣服挾私故人罪坐錄律論戍編伍南丹衛遂釋福達坐薛良等誣告論死帝以羣臣朋姦陷正命逮繫前抗疏劾諸臣給事中劉琦等御史姚鳳鳴等刑部郎中劉仕大理評事杜鸞等詔獄死箠楚狴犴者十餘人餘戍邊削籍謫大理少卿徐文華顧似戍邊及原勘官巡撫江潮以下諸人皆奪官初顏頤壽旣逮治備嘗五毒聞者慘之至是以奪官罷歸四十五年四川妖寇蔡伯貫反擒鞠得以山西李同爲師移捕下獄同自吐爲李午孫世習白社妖教都御史龐尙鵬上言前事當時死事譎戍者皆得叙錄郭勛等追奪官

爵是獄始明

崇禎十七年李自成渡黃河而東郡邑悉降賊毒刑迫餉紳民多斃二月初六日賊至城下時宣鎮張都司守南關按察司楊本鍼爲大城南面主守督糧道藺剛中爲東面主守督學道黎志陞爲北面主守分巡道畢拱辰爲西面主守巡撫蔡懋德總巡四面餘官各守倉庫初八日昧爽小將張急鬼奪南門出降賊焚新南門蜂擁入城民間投井焚縊者不可勝紀賊令曳屍城外隍深三丈許積屍與平巡撫蔡懋德中軍應時盛布政司趙建極巡寧道畢拱辰死之守寧道毛文炳督糧道藺剛中知府孫康周同知李一清遷任同知蔡某俱見殺署陽曲縣事長史范志泰刑斃賊復令搜捕宗室暨紳

宦富民并紳宦族屬妻婢桁夾迫餉郡邑委僞守令慘  
刻彌甚士夫死亡存者無幾五月李自成敗歸時紳宦  
桁夾未死者暨子弟婦女猶幽禁賊至始釋之既乃令  
闔郡紳宦暨妻孥胥解送西安多死於秦是年八月陳  
永福以僞文水伯鎮晉時明宗支尙多永福陰令四城  
僞將分汛捕緝初八日城門晝扃大索一日得千餘人  
殺於海子堰妻產胥沒明日僞大赦村居者僅免晉藩  
殿宇宮闈宏麗剋諸藩賊李自成破太原時人宮首索  
金帛驅宮女已而掠王北上珍物圖書玩好殆盡間爲  
奸民所得而毀裂焚棄者十六七後陳永福據之左右  
亦多攘竊有以寶賢堂古石刻斷砌馬槽者甚可嘆也  
及

大兵破城督撫禁無得一人入府布政司封扃丙戌四月  
十二夜忽烈焰燭天成五色比日出自故內城至宮門  
大殿東西齋殿靈壽諸宮胥爲灰燼飛烟逾月始息